

蕉

軒

隨

錄

焦軒隨錄卷五目錄

楊賜碑

處士

歸鹿放虎

大風

潘墨仙

李文姬

隨任應試

郢中九老

順治年摺紳

寧甯二字通用

竹夫人

滅明

禪悅寺神鐘

僧道加顯秩

輿機

姻

蘭花卷子詞

王世貞庸妄

享國之久

輦桃茆

省中詩

耳衣

九說

惠劉戮瞿銳

應元佳識

記臺灣渡海開祭事

張說

蔣太史答隨園書二首

鳳凰來儀

春宮允遺詩

鷄犬飛昇

食鼠

模木楷木

稱公

夢在君邊

不探虎穴焉得虎子

尹侍郎

雙生

我觀周道

生諛死訕

腰輿

覺生先生遺稿

三后羣后

連敖票客

洪武追封紀信爲王

九仙公主

錢以瑛條奏

告狀

供養

鄉試增五言詩

擬籌積貯書

蕉軒隨錄卷五

定遠方 濬師 子巖

楊賜碑

劉舍人文心雕龍云自後漢以來碑碣雲起才鋒所斷  
莫高蔡邕觀楊賜之碑骨鯁訓典陳郭二文詞無擇言  
按中郎集中楊公碑凡三首一題曰司空文烈侯楊公  
碑一題曰漢太尉楊公碑一題曰文烈侯楊公碑兩書  
公諱賜字伯猷而後漢書賜字則作伯獻

處士



荀子云古之所謂處士者德盛者也能靜者也修正者也知命者也著是者也今之所謂處士者無能而云能者也無知而云知者也利心無足而佯無欲者也行爲險穢而強高言謹慤者也以不俗爲俗離蹤而跂訾者也此言切中士弊昔三士以二桃自殺秦散三千金而士鬪叔孫通以五百斤金賜諸生諸生喜謂叔孫先生真聖人甚矣虛聲之可鄙也

歸鹿放虎

武成歸馬於華山之陽放牛於桃林之野宋袁文寶牖

間評作歸鹿華山之陽放虎桃林之野不知何據

### 大風

乾隆乙丑袁簡齋先生宰江甯五月十日天大風白日  
晦冥城中女子韓姓者年十八被風吹至銅井村離城  
九十里其村氓問明姓氏次日送其還家女婚東城李  
秀才子李疑風無吹女子至九十里之理必有姦約控  
官退婚先生曰古有風吹女子至六千里者汝知之乎  
李不信先生取元郝文忠陵川集示之其詩云黑風當  
筵滅紅燭一朵仙桃落天外梁家有子是新郎辛氏負

從鍾建背爭看燈下來鬼物雲鬢欹斜倒冠佩又云自  
說吳門六千里恍惚不知來此地甘心肯作梁家婦詔  
起高門勝天賜幾年夫壻作相公滿眼兒孫盡朝貴李  
無以應先生復曉之曰郝文忠一代忠臣豈肯誑語但  
當年風吹吳門女竟嫁宰相恐此女無此福耳李大喜  
兩家婚配如初制府尹公聞之曰可謂宰官必用讀書  
人矣又紀文達灤陽消夏錄載闕展土魯番地有風穴  
在南山其大如井風不時從中出每出則數十里外先  
聞波濤聲遲一二刻風乃至所橫徑之路闊不過三四

里可急行而避避不及則眾車以巨繩連綴爲一尙鼓  
動顛簸如大江浪涌之舟或一車獨遇則人馬輜重皆  
輕若片葉飄然莫知所往矣風皆自南而北越數日自  
北而南如呼吸之往返也余在烏魯木齊接闕展移文  
云軍校雷庭於某日人馬皆風吹過嶺北并無蹤跡又  
昌吉通判報某日午刻有一人自天而下乃特納格爾  
遣犯徐吉爲風吹至俄特納格爾縣丞報徐吉是日逃  
計其時刻自己正至午已飛騰二百餘里此在彼不爲  
怪在他處則異聞矣徐吉云被吹時如醉如夢身旋轉

如車輪目不能開耳如萬鼓亂鳴口鼻如有物擁蔽氣  
不得出努力良久始能一呼吸耳按韓女被風吹九十里徐吉一時許二百  
里此中國與沙漠形勢不同古稱風災鬼難之域信然  
又按遼開泰七年節度使勃魯里至鼻灑河遇雨忽大  
風飄四十三人飛旋空中良久墮數里外勃魯里幸  
免時一酒壺在地竟不移袁紀二公均未曾引及也

### 潘墨仙

懷遠潘墨仙

紀少霞明府

繡之兄也六歲目雙瞽長而

讀書一過卽能熟記兼工吟詠性極孝母歿廬墓數年  
如一日有墓下作云老母冢中藏瞽兒冢邊呼倦極依  
冢卧夢見醒又無後二語一字一血漢魏以來作者無

此沈痛筆墨乃於不識字之瞽人得之覺三百篇哀哀  
父母生我劬勞僅止道著一面也陸放翁云乃知母子  
意更遠未嘗隔嗚呼如墨仙者可謂孝矣

### 李文姬

東漢李固女名文姬嫁同郡趙伯英當固遭梁冀之難  
三子兩死獄中文姬匿其弟燮託固門生王成保全之  
入徐州界變姓名爲酒家傭冀誅桓帝詔求固後燮得  
還鄉里姊弟相見悲感路人范史敘其事於固傳中而  
不入列女彼陳留董祀妻蔡文姬被擄胡中十二年曹

操以其爲蔡邕之女金璧贖歸重嫁于祀吾不知十二  
年在虜中節耶烈耶覲然登諸列女之間不幾爲李文  
姬竊笑歟

隨任應試

康熙十一年壬子科廣西鄉試中式第十二名賈錫爵  
滿洲人是時作宦者子弟隨任准其與省試也見廣西  
歷科題名錄

郢中九老

欽鮑雙五先生督學湖北按試安陸時府縣學校官十

人鍾祥縣教諭蔡理元蘄州舉人年七十六潛江縣教

諭徐洲興國舉人年七十三安陸府教授潘恒月興國

舉人年七十三天門縣訓導胡學洙鄖西歲貢年七十

潛江縣訓導蕭協中嘉魚歲貢年六十八天門縣教諭

李如筠江夏舉人年六十七京山縣訓導邱齊益武昌

優貢年六十五京山縣教諭柯光澍大冶舉人年六十

二安陸府訓導楊萬炳松滋歲貢年九十一惟鍾祥縣

訓導蕭煥竹谿廩貢年四十四為最少自楊君以上九

人合六百四十三歲連閏扣去虛日共閱甲子三千九



百一十有羸先生有郢中九老歌亦嘉話也

順治年摺紳

紀文達公

時

家藏順治間摺紳一部按其序文始於順

治丙戌蓋自甲申定鼎至丙戌年方有刊本見吳香亭

侍郎文集

宋趙升朝野類要摺紳仕宦之稱指其笏帶而言也

寧甯二字通用

慕陵聖譚下一字今改作甯字按此二字古本通用史記酷吏傳有寧成漢書作甯成廣寧縣漢書地理志作廣寧晉書作廣甯蓋皆本於左氏傳公孫寧儀行父公

羊傳乃作公孫甯儀行父也改字敬謹避諱適與古合  
竹夫人

編竹如圓枕空其中長三四尺夏月抱以卧可以清暑  
名之曰竹夫人東坡詩留我同行木上座贈君無語竹  
夫人是送竹几與謝秀才俗呼竹几亦曰竹夫人也

滅明

澹臺子羽名滅明莒展輿之黨有公子滅明見昭公元  
年左氏傳

禪悅寺神鐘

澈浦東門外禪悅寺有鐘一口相傳初鑄成時叩之無聲僧某自海上來云鐘失魂故不鳴乃使人入海招魂再叩之聲聞數十里矣

僧道加顯秩

魏僧法果曇證並加老壽將軍唐武后加僧懷義左衛大將軍梁國公中宗除道士史崇恩國子監祭酒加道士葉靜能金紫光祿大夫睿宗時長安浮屠慧範封上庸郡公與誅張易之擢三品御史大夫又代宗加不空和尚開府儀同三司肅國公遼太平五年加道士馮若

谷太子中允重熙十九年加僧惠鑑檢校太尉咸雍二年加僧守志五年加僧志福并守司徒宋欽宗靖康元年以僧趙宗印爲參議官元劉秉忠明姚廣孝陶仲文可以有偶矣

### 輿機

曾子問輿機疏以木爲之如牀先用繩繫兩頭謂之樛姻

妻父曰婚壻父曰姻定公十三年冬晉荀寅士吉射入于朝歌以叛左氏傳曰荀寅范吉射之姻也荀寅之子

娶吉射之女云

蘭花卷子詞

楊小坡茂才

組榮

工填詞有爲王謙齋茂才題秦淮女

史吳瑞雲蘭花卷子南北曲一套聲調蒼涼借題感興

置之曲譜中不減玉茗風韻也詞曰

正端正好莽天涯

人何處望江南榛棘荒蕪花心更比人心苦

是一篇

着

色的

離騷賦

卷續想當初

十二欄干簾影疎三五中秋

月影孤看樓外垂楊一樹把長橋遮得模糊甚文章大  
小蘇甚神人大小姑喬珠娘烟花寨王俊王郎曠代才

無那管他桃花竟日隨流水端的是寒雨連江夜入吳

對畫蘭媚影親摹說和你是個阮藉窮途他是個卓氏

當壚鍾情的夢兒中陽臺遇雨傳神的畫兒中空山泣

露小梁那時節院落沈沈日影晡他爲你涵翠調珠還

有個可人捧硯是掌中珠迴眸顧花也病難扶么怎地

中隱隱鳴金鼓眼睜睜斷梗江湖血染了石頭城屍填

了桃葉渡你尙有生綃一幅花不共人枯上小一霎時

香簾繡幕都變了幾堆黃土再休提風雨秋燈烟波畫

船詩酒狂徒看樓鳥聽啼蛄野花無主享一點畫蘭名

天還嫉妬

公

則爲你

名魁花譜花爲香祖

俺也曾裘典

鵲鵲裙潑胭脂帳掩珍珠倡家雛酒家胡緩謔慢舞只

落得

鬱蒼蒼斜陽滿樹

兒

要孩王郎呵你

當年箏笛鳴秋

浦刷一片蘆花舞絮抽刀殺賊竟何如破青衫依舊寒

儒留得個

一叢香草三生石

最傷心

滿地飛灰萬卷書

喫緊的相思譜

雖則是

無人可賞

却怎生

有口難餉

五

深惜你

倦吟花詩句香醉談兵膽氣粗大人藐視終難

遇禍衡不肯游江夏西子何曾去五湖目斷臺城路似

你這深山小草

怎難忘

野水殘蒲

四

最愛你

亂排場不

讓人風頭銜眾口誣薰猶雜處心良苦這壁廂八公草

木新烽火那壁廂六代江山舊畫圖一卷朝和暮猛想

起悲歡離合塗抹些也者之乎三堪笑你謁塗山眼界

空弔荆人獨自哭蘭魂吹入琴堂幕說甚麼黃衫傾倒

真名士他也曾紅拂私奔莽丈夫一瓣心香炷怎當日

飄零蕩子又做了勇敢狂奴二可恨你破蒲團坐得拘

舊青氍守得愚怎十家姊妹將人悞江淮才子名雖重

脂粉嬌娃骨已枯大劫皆天數可記得紅巾搵淚綠酒

提壺一倦勸你謝風情多讀書覓生涯且濫竽黃金杜



牧人爭鑄只爲你深深香霧迷蝴蝶因此上苦苦春風  
叫鷓鴣一唱君當悟似這般情苗恨盡到不如永斷根  
株麗知君牽夢魂代君訴肺腑可憐曲悞無人顧我待  
要請正蘭花花不語

王世貞庸妄

知人論世士君子之責然須實有見地方不沒是非好  
惡之公若違一己筆舌輕議古人則謬之甚者也吾祖  
元英先生遜隱會稽鑑湖之濱漁釣爲樂時稱逸士廣  
明中和間江南爲律詩未有及先生者王贊序先生詩

爲入錢起之室唐末宰臣張文蔚中書舍人封舜卿奏  
名儒不過十五人請賜一官以慰其魂先生其一孫邵  
作傳亦推許極當唐詩紀事所云先生爲人野質每見  
人設三拜曰禮數有三識者呼方三拜不過述名賢風  
韻初無貶詞也王世貞弇州四部稿中以先生之三拜  
比之宋朱元晦孫之號朱萬拜者斷爲人妖濬師按晦  
翁曾孫浚當賈秋壑柄國時官浙漕每有札子稟事必  
稱某萬拜覆時人謂浚爲朱萬拜夫先生之三拜自鳴  
其高朱之萬拜諂事權相一名儒一巧宦謂巧宦爲人

妖則可謂名儒爲人妖則世貞自居何等耶 四庫全  
書提要稱世貞初羽翼李攀龍後歸然獨存爲時耆宿  
其聲價遂出攀龍上而摹擬剽襲流弊萬端其受攻亦  
甚於攀龍洵屬確論歸熙甫曰世貞爲庸妄子信然哉  
信然哉

享國之久

堯舜以後人主享國之久者夏履癸

卽桀

五十二年商太

戊七十五年武丁五十九年周昭王五十一年穆王五  
十五年宣王四十六年平王五十一年敬王四十四年

顯王四十八年赧王五十九年漢武帝五十四年蜀後  
帝四十年梁武帝四十八年唐元宗四十六年宋仁宗  
四十二年理宗四十年明世宗四十五年神宗四十八  
年其間夏桀昏暴周昭溺楚平王東遷蜀後主出降梁  
武餓死臺城唐元宗遭祿山之亂宋理宗局於南渡之  
後按遼聖宗在位四十  
九年究非正統可比若我  
大清

聖祖仁皇帝在位六十有一年

高宗純皇帝在位六十年尊

太上皇帝四年

祖

孫相承垂衣裳而治者百二十餘歲萬邦協和中外臣民悉被太平之福盛矣哉足以方駕三五超邁漢唐矣

葷桃茆

禮玉藻膳於君有葷桃茆於大夫去茆於士去葷皆造於膳夫鄭註膳美食也葷桃茆辟凶邪也大夫用葷桃士桃而已葷薑及辛菜也茆莢帶也按檀弓君臨臣喪以巫祝桃茆執戈惡之桃是桃枝茆是萑苕所以埽除

不祥若君用膳何必用此辟凶邪之物且不知有何凶邪之可辟殊覺牽強不近理鄙意葷卽葱蒜等物釋家以大蒜小蒜興渠荅醋葱爲五葷道家以韭蒜芸臺葱薤爲五葷桃卽桃諸王肅云諸菹也荊卽爾雅勃荊註一名石芸說文凡草之可食者皆曰菜芸草似目宿菜急就篇註芸蒿生熟皆可啗則石芸當卽芸臺范石湖詩菰心青嫩芥臺肥可證芸臺芥臺皆食品所必需

### 省中詩

吳潘黻庭前輩曾綬省中雜詩云秋高萬籟靜無聲官

燭名花照眼明不見薰香雙侍史窺人只有月多情

徐中

丞士林康熙癸巳進士初官中書有司云歸來惹得山妻問侍女薰香近有無中書典故費探

研畫省簪毫二十年閉戶著書人海裏至今一序共流

傳杭州王義山正巧出入省闕二十年每入直輒搜考檔案勒成一書名中書典故彙紀其目有六口官制

職掌儀式恩遇建置題名而以雜錄終焉杭世駿爲作序人分四值共趨班辰入申

歸僕僕間齊下三單忙注本一鞭恰趁夕陽還

遇啟登封印

日則三日領歸摺件寫分明守晚親聽玉漏清

聖駕進宮日

早班領每日更有改簽新式樣除官

硃筆

自題名凡簽御筆親書者爲硃特旨改票爲改簽楮陰線繞北垣前妙

筆鴻臚點綴妍日影參差人久坐相公真是地行仙

內閣

北垣下有老楮一株歲久成陰相國澤州公機務之暇時一憩焉泰州禹之鼎繪成楮窗圖公自題二詩查慎行和之云洵知黃閣異人間獨樹能高便不願蕭灑坐看移日影婆娑行愛繞苔斑堂餐撤後仍開卷賜杖携來正押班爲報官居如邸第太平機務有餘間余儼直十年校書三館誦黻庭詩覺此身猶在五雲深處也

## 耳衣

唐李廓送振武將軍詩云金裝腰帶重錦縫耳衣寒按耳衣卽今北地冬月所用耳套

## 九說



董醞卿尙書有九說一篇茲錄之說云歲乙丑總稅務司赫德言數之中惟九最奇詳叩其說曰一九自成爲九及十九百九千萬九億九凡無奇零與一九同者不必言也至如二九一十八一八九也三九二十七二七九也四九三十六三六九也五九四十五四五九也六九五十四五四九也七九六十三六三九也八九七十三七二九也九九八十一八一九也又如十一九爲九十九九九卽一十八一八九也十二九爲一百八十八九也十三九爲一百二十七一一七九也十四九爲一

百二十六一二六九也十五九爲一百三十五一三五  
九也十六九爲一百四十四一四四九也十七九爲一  
百五十三一五三九也十八九爲一百六十二一六二  
九也十九九爲一百七十一一七一九也二十九爲一  
百八十一八九也又如二十一九爲一百八十九一八  
九卽一十八一八九也二十二九爲一百九十八一九  
八亦卽一十八一八九也二十二九爲二百七二七九  
也二十四九爲二百一十六二一六九也推而至於二  
十九九爲二百六十一二六一九也又推而至於九十

九九爲八百九十一八九一卽一十八一八九也又如  
一百一九爲九百九九卽一十八一八九也一百二  
九爲九百一十八九一八亦卽一十八一八九也一百  
三九爲九百二十七九二七亦卽一十八一八九也推  
而至於一百九九爲九百八十一九八一亦卽一十八  
一八九也又推而至於九百九十九九爲八千九百九  
十一八九九一卽二十七二七九也又推而至於九千  
九百九十九九爲八萬九千九百九十一八九九九一  
卽三十六三六九也又推而至於九萬九千九百九十

九九爲八億九萬九千九百九十一八九九九九一卽  
四十五四五九也又如八億九萬九千九百九十一減  
一九餘八億九萬九千九百八十二八九九九八二卽  
四十五四五九也再減十九餘八億九萬九千八百九  
十二八九九八九二亦四十五四五九也再減百九餘  
八億九萬八千九百九十二八九八九九二仍四十五  
四五九也再減千九餘八億八萬九千九百九十二八  
八九九九二亦仍四十五四五九也又如八億八萬九  
千九百九十二減九千九爲八萬一千餘八億八千九

百九十二八八九九二卽三十六三六九也再減八千  
九爲七萬二千餘七億三萬六千九百九十二七三六  
九九二亦三十六三六九也再減七千九爲六萬三千  
餘六億七萬三千九百九十二六七三九九二仍三十  
六三六九也再減六千九爲五萬四千餘六億一萬九  
千九百九十二六一九九九二亦仍三十六三六九也  
再減五千九爲四萬五千餘五億七萬四千九百九十  
二五七四九九二仍三十六三六九也再減四千九爲  
三萬六千餘五億三萬八千九百九十二五三八九九

二仍三十六三六九也再減三千九爲二萬七千餘五  
億一萬一千九百九十二五一九九二卽二十七二  
七九也再減二千九爲一萬八千餘四億九萬三千九  
百九十二四九三九九二卽三十六三六九也再減一  
千九爲九千餘四億八萬四千九百九十二四八四九  
九二亦三十六三六九也推之而再減九十九九爲八  
百九十一餘四億八萬四千一百一四八四一一卽一  
十八一八九也又推之而再減九百九十九九爲八千  
九百九十一餘四億七萬五千一百一十四七五二一

亦卽一十八一八九也又推而再減九千九百九十九  
九爲八萬九千九百九十一餘三億八萬五千一百一  
十九三八五一一九卽二十七二七九也離之而九合  
之而九益之而九損之而九縱之而九橫之而九蓋隨  
意所之回環往復而無不然也由是而兆而京而垓而  
秭而壤而溝而澗而正而載亦無不然也此惟九爲然  
八以下皆不能然也覆按之信恂惟六經言數莫詳於  
易而乾元用九未著此義疇人書汗牛充棟號九九術  
而目所經見亦未有此者恂生五十九年矣今乃以至

淺至近者而竟聞所未聞則終身由之而弗之覺此外正不知凡幾也噫可懼也

### 惠劉戮瞿銳

周禮司兵之掌以戈殳矛戟牟夷爲五兵司馬兵法以弓矢殳矛戈戟爲五兵樊文淵七經義綱格論車上五兵戈殳車戟酋矛牟夷步卒五兵戈殳車戟酋矛矢是司兵所掌乃車上之器司馬所云乃步卒之器也古兵器體異名殊形制難於稽考書顧命執惠執劉執殳執瞿執銳他經傳中皆無聞鄭氏云惠狀斜刃宜芟刈劉



今鑱斧戣瞿今三鋒矛與孔安國註惠三隅矛劉鉞屬  
戣瞿皆戟屬不同按惠本通鑑集韻鑱音叡侍臣所執  
兵器瞿通戰唐韻古四出矛爲戰又作鑱說文兵器也  
銳當卽左傳成二年銳司徒免乎之銳蓋司徒主銳兵  
者也然則鄭孔所註不如王肅皆兵器之名五字爲簡  
截了當

應元佳識

寶應王補帆中丞

凱泰

官廣東布政使時倡設孝廉書

院擇地於粵秀山麓之應元宮宮祀雷神歲久傾圯爰

移雷神於後山顛而講堂成焉應元之名出道書中丞  
卽因應元二字爲書院名實爲會試 殿試之佳兆也  
中曰樂育堂右曰紅杏山房左曰仰山軒曰奎文閣堂  
之下又堂三楹東偏爲監院院東曰十三本梅花書屋  
中丞五世伯祖樓村先生式丹康熙癸未會狀嘗以所  
居十三本梅花書屋繪圖徵詩故中丞植梅題額如之  
不特述祖德亦仍以佳名爲之兆也書屋西偏爲董事  
所外出爲中門又出爲大門門外爲蓮池自大門至樂  
育堂累數十級西鄰菊坡精舍距學海堂不半里許皆

課土地中丞題仰山軒楹聯云嶽峙層霄海內斯文尊  
北斗雷鳴昨夜天公有意屬南州又題十三本梅花書  
屋楹聯云開閣集羣英到處宛如逢舊雨和羹期異日  
諸君何以對名花已巳秋書院落成延馮展雲少詹主  
講中丞復籌備經費手訂規條彼都人士皆欣欣然相  
告曰阮文達建學海棠後此其繼矣庚午科予提調粵  
闈與中丞共事月餘適中丞奉 命開府八閩瀕行約  
予遍行遊覽予有詩紀之越明年辛未 殿試一甲一  
名進士果順德梁耀樞書院中肄業孝廉也中丞狂喜

不禁復撰一聯寄題講堂云瑞兆豈無因不負隔年彈

柳汁

書院首課曾以柳汁染衣命題

科名原有定適逢佳會種梅花蓋

培植士林之盛心不僅使八百孤寒下淚矣昔宋廣平

投梅花賦於蘇味道而得列閭人之目今中丞種梅花

於書院而遂兆大魁之祥是所望於安排狀元宰相之

人哉又汀州童貳尹

源潤

精青烏學曾爲梁君之祖卜

吉壤許葬後可得鼎甲不二十年其應如響術亦神矣

爰連類書之

記臺灣渡海開禁事

臺灣自古不通中國名曰東番明天啓中紅毛荷蘭夷人居之屬日本 本朝順治六年鄭成功據而逐荷蘭夷僞置承天府名東都設二縣曰天興萬年其子鄭錦改東都曰東甯省升縣爲州康熙二十年用姚啓聖議授施琅爲靖海將軍征之二十二年琅率舟師由銅山進入八罩直抵澎湖殲其精銳鄭克塽窮蹙歸命臺灣平改置府治領縣三雍正元年復添設一縣初私渡之禁嚴閩粵人利其土地肥美輒偷往開墾久之欲歸則不忍棄業歸則干例禁其父母妻子之在內地者亦不

得往大吏憫焉曾奏寬其禁未幾復停罷乾隆己卯光  
州吳湛山先生士功撫閩特以情上聞其疏曰凡有  
渡臺人民禁絕往來不能搬移現在臺地漢民已逾數  
十萬其父母妻子身居內地者正復不少若棄之而歸  
則失謀生之路若置父母妻子於不顧更非人情所安  
故其思念父母繫戀妻孥實有不能自己之苦衷以致  
急不擇音冒險偷渡百弊叢生伏查乾隆十七年原任  
臺灣縣知縣魯鼎梅纂修臺灣縣志云內地窮民在臺  
者數十萬其父母妻子俛仰乏資急欲赴臺就養格於

例禁羣賄船戶頂冒水手姓名掛驗婦女則用小漁船  
夜載出口私上大船抵臺復有漁船乘夜接載名曰灌  
水經汎口覺察奸梢照律問遣因刑當其罪而杖逐回  
籍之民室廬拋棄器物一空矣更有客頭串通習水積  
匪用涇漏船隻收載數百人入艙將艙蓋封釘不使上  
下乘夜出洋偶值風濤盡入魚腹比到岸恐人知覺遇  
有沙汕輒趕騙離船名曰放生沙汕斷頭距岸尙遠行  
至深處陷沒泥淖中名曰種芋或潮漲漂溺名曰餌魚  
窮民迫於饑寒相率入陷阱言之痛心志言如此臣思

愚民之被害奸梢之肆惡魯鼎梅身泣臺灣見聞自確  
載諸邑乘考訂非虛臣一載以來留心察訪實屬確有  
之事然卒未有因陷溺而告發者緣在汪洋人跡罕到  
之地被害者既已溺於波臣倖免者亦緣自干禁令莫  
敢控告故例禁雖嚴而偷渡接踵臣計自乾隆二十三  
年十二月至二十四年十一月一載之中共盤獲偷渡民  
人二十五案老幼男婦九百九十九名口內溺斃男婦  
三十名口其已經發覺者如此其私自過臺在海洋被  
害者恐不知凡幾伏念內外民人均屬



朝廷赤子向之在臺爲匪者悉出隻身無賴若安分良民旣已報壘立業有父母妻子之繫戀有仰事俯育之辛勤自必顧惜身家各思保聚此從前督撫諸臣所以疊有給照搬眷之請也及奉准行過臺以後亦未有在臺滋釁生事者乃因奸民偷渡致令良民在臺者身同羈旅常懷內顧之憂在內者悵望天涯不免向隅之泣以故老幼婦女斃獨無依之人迫欲就養竟致鋌而走險畢命波濤非所以仰體我

皇上如天之覆一視之仁也合無仰懇

勅部定議嗣後除內地隻身無業之民及並無嫡屬在臺者仍遵例不許過臺有犯卽行查拏遞回外若在臺有業良民果欲迎其祖父母父母妻妾子女子婦孫男女及同胞兄弟過臺者許赴臺地接管官報明籍貫眷屬姓氏年歲冊移原籍覈覆給照回籍搬接其在內地眷屬欲過臺完聚報明該管地方移臺核覆申督撫給照亦如之過臺時驗照放行如人照不符而放行及濫給路照各當該官司均分別議處其餘偷渡人仍如舊例嚴禁疏入下部議行從此渡海良民感頌

皇仁咸有室家之慶矣

張說

漢安王懿侯張說

師古曰說讀曰悅

以卒從起方與屬魏豹一

歲五月以執盾入漢以司馬擊項羽以將軍定代侯二千戶唐張燕公蓋襲其名是古今有兩張說也

蔣太史答隨園書二首

蔣心餘先生藏園文集文孫雲樵太守

立昂

重刊於廣

州持以餉予獨缺答隨園老人二書特爲錄出并屬太守補刊於後也

附錄答隨園書

士銓頓首隨園先生士銓生于貧賤又少師承天性  
所發遂恣肆爲詩間質之時賢所贊皆不中窾竊以  
自厭乳臭之子纔知平仄便掉一帙邀名于盲瞽之  
大人先生心竊非之故行年四十無一句鐫板者意  
欲得大知識正法眼論定然後自信讀公來札數千  
言如久痼之人得和緩砭針始而肌肉慄慄然繼則  
筋骨融融然終之以暢然熙然而疾霍然大起公才  
冠一代乃于區區之後生片長薄技苦心鞭策之珍

愛若斯使公爲宰相則三百六十之官皆得其能者而用之天下寧有棄物士銓何足重輕而公之心乃斯文命脉所關此士銓所以爲天下不遇知己者哭更爲天下幸獲知己者狂舞歡笑而不能自止也拙詩斷自甲子甲子以前一火了之後至壬申纔彙草稿得公震撼之今年當于會稽卒其業士銓昨日服七品官服拜祖先畢卽躬走謁蓋欲面叩千百求爲先公存數字不料公以校勘拙集之故爲我謝我感泣何似否則賀前輩年正不必如此其至誠也先公

事實無誣罔公酌收之不拘體製并不必拘立傳與  
銘墓也 覆書方去詩冊遽來就老母爐火光中急  
讀之覺天雲下垂海水斗立此氣乃孟子之氣豈資  
黜所能萬一而云學某體何也士銓感激汗潁不知  
所措寶之拜之所針砭處字字確當悵得師之晚悔  
失路之多怍怍不能自己收之桑榆不敢不勉

公文海涵地負嶽峙淵停爲四五百年來第一作手  
大抵以史漢爲根柢而沉浸于歐柳之文其風趣雋  
妙又兼南北史晉書之神真氣鼓盪刻畫忠孝標繪

奇詭使讀者或哭或笑狂叫跳舞不能自止一代巨  
公元老傳之史冊者不能詳其軼事非滯則板未足  
盡其人生平兩夕以來朗誦二過老母山妻掩泣者  
案歔輒不勝而幼子聞角黍蘸硃及戴石曰而舞書  
佛頂羅漢身上詩皆笑躍不止季者問曰當更覓題  
佛身上詩來一讀之必驚倒阿爺也然則公文之傳  
百世而入肌膚于此已見其端矣方知公文在人間  
乃天地鬼神假公巨手以發靈秘定非尋常生一才  
人可比銓又何足以少益高深乎銓遍觀時賢所爲

古文無十分滿意者魏叔子失之雜侯壯悔失之空  
汪鈍翁間露時文氣若靈臯乃枯骨槁木不足言簡  
潔文輒隸湊成句死氣滿紙閱之不能終篇公才大  
心細識超學醇故宏放中頓挫剪裁掩出諸公之上  
銓惟有五體投地而已彼規摹古人而自命者不能  
騙若生一長揖也饒舌狂言死罪死罪

鳳凰來儀

雍正七年十一月三十日天台山中有鳳凰高五六尺  
毛羽如錦五色俱備立處羣鳥環繞北向飛鳴八年正



月二十日房山縣石梯構山中鳳凰集於峯頂文彩燦然工匠樵牧民人等千有餘人無不共見

春宮允遺詩

長白春玉峯先生

春輅

與其兄都護公

春熙

同舉京兆

同隽禮部復同入翰林歷官中允工詩古文辭惜稿多散佚詰嗣南星同年

瑞昌

檢書簾中所藏遺詩數首見

示各體均有唐音亟登之俾讀者嘗鼎一臠亦足珍也

五古如冷家庭院海棠盛開答德臨舉前輩

德興

云人

門春正賒蜂蝶喧晴晝花開如有約客至適云觀紅酣

春睡足環燕較肥瘦卯醉暈朝霞午薰堆錦繡天心誇  
旖旎美景良難售此行已清暇況復名花就將軍鎮古  
易清風冠宇宙虎帳運韜鈴玉堂欽鳳舊贈我錦囊什  
語雋奪山秀餽我盆中花異香散衿袖聞說鎮署前春  
事尤繁茂富貴乃天成神仙亦邂逅香霏敞高閣清讌  
閒觴伯雅音謝殷勤蕪詞愧荒陋借此杯酒歡願爲將  
軍壽七古如新店早發云荒雞喔喔啼未已野店晨光  
催客起出門宿靄散蒼茫日華湧出扶桑紫忽聞人語  
出烟中春耕力作千家同麥苗綠潤蜻蜓雨菜甲黃翻

蛺蝶風馬行緩轡搖珠勒領畧嵐光與水色倪迂畫本  
輞川詩萬變雲烟爭頃刻心安不知途路長郵亭驛堠  
遙相望安得閒游恣登眺芒鞋踏遍春山蒼臨臯前輩  
招飲賞花賦謝云將軍招客開瓊筵錦屏繡幕春風妍  
春光九十風廿四等閒花裏逢神仙神仙偏欲留春住  
穠華天遣春陰護將軍家在香國中富貴風流本天賦  
今我來思賞此花舉杯何惜醉流霞舊雨重逢欣促膝  
芝蘭臭味無纖差對酒頻將旣醉歌今年花事賞心多  
曉鐘未動春猶在明日尋春奈去何近體如暮宿陶家

屯云野店人來少幽閒慰客情餅香初識味腐美早知

名

相傳此地小底麥餅醬煮豆腐最佳

遠樹斜陽盡深林暮靄橫繩床安

卧後宵夢有餘情督工易水呈文孔脩師云京國春光

九十時輕車遄發載驅馳庀材細檢冬官記尙匠重尋

夏后規敢以麤才卑末伎須知善事有先資機宜指畫

憑遵守竊喜晨昏近絳帷鵲華秋色薊門烟次第星輶

奉使旋

乙酉乙未師皆入闈校士

虎榜昔羅多士盛鳩工今構眾材

全移將玉尺供裁度別有金繩界曲拳畢竟矩規資哲

匠古來板築屬名賢遊張氏園林云幾日黃沙撲面迎

喜從別墅解行旌到門山色還相引映戶花光倍有情

市近不愁沽酒遠

出門數武卽半壁店街

泉高偏愛煮茶清塵勞

頓息天機適靜聽時禽自在鳴文孔脩師見示贈答德

臨皋總戎招飲賞花諸作賦詩紀事云穠香滿紙賦新

詩風雅騷壇仗主持舊雨聯吟開畫閣春陰著意護花

枝幽懷暢敘空前哲勝日芳菲訂後期

原作有開到牡丹期後約句

我讀瑤章頻往復欲摹高格愧蕪詞和臨皋前輩海棠

詩韻云瞥眼韶華已十分淡紅香白一羣羣繡屏高敞

霏香閣錦陣橫排細柳軍容裡看花春似醉公餘遣興

氣如雲羨君坐鎮饒清福徙倚朱闌對夕曛誰家金屋  
貯相當深鎖東風絕世妝蝶夢有痕尋舊約駒陰如駛  
惜流光邀來名友詩兼酒譜定神仙色是香回首昔年  
鴻爪印國花猶記咏禪房翠芳管領付詩人又結三生  
未了因金谷園中春似海碧雞坊裏艷如神柔絲莫遣  
風相妒瘦影偏依月作隣開到牡丹期後約敢辭下里  
和陽春謝文公分賜南鮮云登盤珍果許分嘗也抵南  
豐奉辦香吟罷不愁詩思苦好調冰雪潤枯腸芳園小  
聚一樽開伴到剛逢佳客來

是日方留文晴  
軒水部便飯

春橘猩紅

梨雪白王賓花下侑銜杯又詠海棠花云一抹朝霞暈  
曉妝猩紅豔絕碧雞坊從來有色香原淡何必春深恨  
海棠

鷄犬飛昇

神仙傳八公與淮南王安臨去時餘藥器置在中庭鷄  
犬舐啄之盡得昇天故鷄鳴天上犬吠雲中又水經注  
唐公房學道得仙合丹服之白日昇天鷄鳴天上犬吠  
雲中唯以鼠留之乃感激以月晦日吐腸胃更生故時  
人謂之唐鼠是雞犬得仙事有二吳梅村詩我本淮王

舊鷄犬不隨仙去落人間予謂梅村晚節不特有愧劉  
安之雞犬并不能效感激之唐鼠也

### 食鼠

嶺南好爲蜜唧取鼠胎未瞬者飼之以蜜釘之筵上以  
筯挾取啖之唧唧作聲故曰蜜唧見朝野僉載嶺南人  
食鼠號爲家鹿見倦遊錄予官嶺西同年李恢垣吏部  
以番禺鄉中所醅田鼠見餉長者可尺許云味極肥美  
不亞金華火肉予究有所嫌未敢入口也

### 模木楷木



模木生周公冢上楷木生孔子冢上見淮南王木譜

### 稱公

爾雅釋詁林烝天帝皇王后辟公侯君也漢鼂錯父謂錯曰上初卽位公爲政用事侵削諸侯別疏人骨肉外議多怨公此父稱子以公也文帝問田叔公知天下長者乎對曰臣何足知長者上曰公長者固宜知叔頓首曰孟舒其人此君稱臣以公也宋何偃呼顏延之公顏曰身非三公又非田舍公又非君家阿公何見呼爲公偃慙甚今人尊顯位及長輩爲公而於平輩曰君曰侯

頗有輕重之別矣

夢在君邊

道光戊申鉛山熊筱泉

存漢

在揚州寄牙章見贈篆文

曰夢在君邊章法古逸云是舊鹺商某家物携之篋中  
十餘年余弟濬益甚愛之遂舉以付弟囑善守勿失或  
問於余曰君邊二字俗否余曰君邊雲擁青絲騎妾處  
吾生紅粉樓李青蓮擣衣篇也或始恍然悟

不探虎穴焉得虎子

見吳志呂蒙傳蒙十五六隨鄧當擊賊母欲罰之蒙曰

貧賤難可居不探虎穴焉得虎子

尹侍郎

博野尹元孚曾一少孤貧讀書勵志篤信程朱所著述

有君鑑臣鑑士鑑女鑑增定洛學編北學編事母孝乾

隆八年

高宗特賜太夫人

御製詩及楹聯天下榮之官江南學政時蒞金陵徒步  
造清涼山下潭亭謁吾宗望溪先生執弟子禮恭甚旋  
卒於官先生曾爲誌墓少宰子嘉銓由舉人官部曹海

歷方伯擢任京卿乾隆四十六年休致在籍忽遣其子  
賁摺爲少宰請諡并請將少宰從祀

孔子廟廷

上震怒命英公

廉

袁公

守伺

檢查嘉銓京寓及本籍所

著各書其中頗有悖謬處恭讀

上諭中云朋黨爲自古大患我

皇考世宗憲皇帝御

製朋黨論爲世道人心計明切訓諭乃尹嘉銓竟有朋  
黨之說起而父師之教衰君亦安能獨尊於上哉之語  
古來以講學爲名致開朋黨之漸如明季東林諸人講

學以致國是曰非可爲鑒戒乃尹嘉銓反以朋黨爲是顛倒是非顯悖 聖製誠不知是何肺腸且其書又有爲帝者師之句則竟儼然以師傅自居無論君臣大義不應如此妄語卽以學問而論內外臣工各有公論尹嘉銓能爲朕師傅否昔韓愈尙言自度若世無孔子不應在弟子之列尹嘉銓將以朕爲何如主耶又其書有名臣言行錄一編將本朝大臣如高士奇高其位蔣廷錫鄂爾泰張廷玉史貽直等悉行臚列無論此諸臣居心行事不能及古名臣且以本朝之人標榜當代人物

將來伊等子孫恩怨卽從此起門戶亦且漸開所關朝  
常世教均非淺鮮卽伊託言仿照朱子名臣言行錄朱  
子所處當宋朝南渡式微且又在下位其所評隲尙皆  
公當今尹嘉銓乃欲於國家全盛之時逞其私臆妄生  
議論變亂是非實爲莠言亂政又尹嘉銓在山東藩司  
任內面求賞戴花翎且敢於朕前肖述伊妻言狀稱不  
得賞卽無顏相見等語彼時伊毫不知耻而朕之深鄙  
其人實從此始也然尙欲全伊顏面從未宣示廷臣昨  
日廷訊伊自述不愧此種行徑豈講學者所宜爲耶至

其託言夢中神人告以係孟子後身當傳孔子之道又  
朕御製古稀說頒示中外而伊竟自號古稀老人且欲  
娶年逾五十之處女爲妾所行種種乖謬出於情理之  
外其他狂悖誕妄見於所著各書者尙不一而足正所  
謂少正卯言僞而辯行僻而堅爲所必誅者伊從前經  
朕屢次保全休致回籍本可終其餘年悻逃法網乃惡  
積罪盈自行敗露此實天理昭彰可爲天下盜竊虛名  
妄生異議者之戒等因欽此旋卽處絞自來講理學者  
不失迂曲卽失執拗此聖人所以重體用兼備也

## 雙生

揚子方言東楚間凡人鬻乳而雙生謂之釐孖秦晉間謂之儻子自關以東謂之孿孿雙生也殷王祖甲之一婦一頁許釐莊公之一妹一茂若周八士一母四乳陸終氏娶鬼方氏之女一產六人尤爲奇特左傳昭公十一年孟僖子會邾莊公盟于祿祥泉丘人有女夢以帷幕孟氏之廟遂奔僖子其僚從之僖子使助遷氏之適生懿子及南宮敬叔杜預集解謂似雙生果爾以一奔女誕生兩賢且并及孔子之門亦罕見也



我觀周道

諸城劉燕庭先生喜海性喜譔官浙藩時有周君者以觀察需次浙中一日衙參司道畢集周不至先生問之旁有告者曰周君病痢甚劇已請假是以不果來也公笑顧同官曰我觀周道幽憂厲痢傷之矣合坐爲之捧腹

生諛死訕

王述庵侍郎補致袁簡齋先生書一則曰執事以科第耆英文章老宿作魯靈光巋然爲東南士人所仰止此

固

聖朝人瑞微獨壇坫增輝而已再則曰弟選湖海詩存已斷手亦作詩話以發明之中論大作謂如香象渡河金翅擘海足以推倒一世豪傑明歲勒成當以呈教云

云今閱湖海詩傳中蒲褐山房詩話稱其太邱道廣無論賢郎蠢夫互相酬答又取英俊少年著錄爲弟子挾之游東諸侯更招士女之能詩畫者共十三人繪爲授詩圖燕釵蟬鬢傍花隨柳問業于前而子才白鬚紅舄流盼旁觀悠然自得又云謝世未久頗有違言吳君嵩

梁謂其詩人多指摘今予汰其淫哇刪蕪雜去纖佻清

新雋逸自無慚於大雅

云

及觀所選隨園詩僅二十

首隨意編錄似未嘗經心者不特香象渡河數語全行  
刪去且藉存其詩而大肆譏訕以爲隨園可議也生前  
不應作諛詞卽曰諛之於前而後有悔心何不并其詩  
刪除之置之不論不議之列乃旣佩其才華復妒其聲  
望而又不肯塗抹其盛名遂故作抑揚語欲掩前此貢  
諛之醜至拉出吳嵩梁謂其詩人多指摘夫嵩梁少時  
依傍隨園門牆希冀一語獎勵以聳動公卿耳目固人

所共見其聞者何於隨園身後竟爾逞其狂吠等於今  
之鳥噉獸牟輩耶嘉慶庚辰先世父出守湖州嵩梁贈  
詩末云我識碧瀾堂下路願爲六客繼清遊推尊極矣  
親書短軸以送卽索百金去嗣刊詩集此首不存先世  
父曾笑爲勢利之交予錄出屬林薌溪廣文改之海天  
琴思續錄中昔張商英作元祐嘉禾頌司馬文正祭文  
上呂公著詩求進移書蘇頌濱求入臺多諛詞有老僧  
欲住烏寺呵佛罵祖語後乃乞撲司馬公呂公神道碑  
嗚呼朝野小人此物此志也

腰輿

腰輿以手挽之別於肩輿也南史張寶積乘腰輿詣蕭  
穎胄今漢大臣中有

賜紫禁城騎馬者或年已衰老或不善騎馬許用小椅  
一託以平板兩旁設短木桿以二人舁之入滿大臣非  
年七十者則否蓋卽腰輿之遺製余官京朝時見汪嚙

庵總憲

元方

譚竹巖

廷襄

董醞卿

恂

兩尙書皆能策騎

而行合肥李節相

鴻章

賞馬時年甫四十有六據鞍振轡緩踏玉墀又吾江北

人所常習也歛王子懷少宰茂蔭以南人乘騎不慣又不欲添輿夫之費仍步行入朝一日與余相遇東華門余笑謂曰公儉不中禮敢委

君貺耶公亦笑無以答至肩輿入直者如長文襄長齡

曹文正

振鏞

富文誠

富俊

潘文恭

世恩

皆出

特恩咸豐同治以來惟惠端親王恭親王乘轎進內則又兩朝

聖人敬長酬庸之曠典矣

覺生先生遺稿

余既摛輯鮑覺生先生未刻詩四卷復從子年太守處  
得先生零星手稿無集可人慮其久而散佚也爰登之  
隨錄中以誌景仰

蔣韋玉先生

構

遺墨贊

爲程樂靜泰題

古也有志民生于三猗師教之君親義參薄俗曰顏  
禮經疇肄去故卽新生而倍棄欸欸程生昔于蔣師  
監染荆珎念茲在茲手澤弗諼矧曰提耳遺墨是珍  
况云遐軌高義古情邁于等儕披觀根觸實感余懷  
黃海雲歸紫泉月冷思我哲人涕下如綆

謂先師吳  
滄泉夫子

張楊園先生像贊

前身仁山曰張楊園幅巾道袍倚風禁寒樽罍寫之  
曉澹繼焉侍御陳君見而畢然倩野雲氏摹之素練  
鳴呼先民邈矣九原不有好事馨歆曷存冰由水成  
火以薪傳我爲贊詞以詔後賢

宋平遙

竹苞禱雨贊

放勲遺封曰古陶邑有崇山焉飈出電入英英宋侯  
來綰邑符時值曠乾走望而趨侯躋厥巔穆與神對  
神俯而答吾膏汝逮油雲草興惠風徐徐侯未還邑



甘霽已濡豈惟濡之又滂沛之毗杼叟呼曰永賴之  
翳神之靈翳侯之愛敬告後賢芳徽無沫

宋忻州

竹苞伏狐贊

公昔禱雨神惠伊溥公茲伏妖神感匪遙惟公與神  
以兩而化惠豈公私感豈公借古陽曲地今公桐鄉  
父老相告軼事能詳治譜克傳象賢斯在鋪此贊詞  
永懷遺愛

徐晴圃方伯同年

浙從軍圖贊

府設掾史軍有諮謀記室典籤風譽炳彪管唐以降

實存名改諸侯賓客心脅斯在堂堂徐卿修武緯文  
入贊密勿出參雄軍終南之山峻與天際螺旋鳥伸  
疲茶萬騎以一書生慨慷其間盾墨四飛影羽而還  
櫓槍暮沈偃伯朝告西望隴雲宿障如掃圖之煙楮  
被以聲詩壯哉斯游談者色飛棄繻請纓吾少也志  
鬢霜已秋掩卷吁噓

陳定齋先生玩易圖爲聞之同年

若疇

題

玉門演鐵撾折十言宣一畫泄漢宋競理象歧猗先  
生一貫之起邊隅官中外震无咎乾知退萬山中手

一編俛孳孳服拳拳猗先生不可作天地心聖賢躅  
嗟末學向紛如高山仰在斯圖

雲門六叟圖贊爲喬鷗邨先生

昔唐九老有狄兼謩涑水踵之耆英是俱喬公六二  
論年猶少以道則尊名高德劭偕彼五叟萃爲六逸  
秀眸豐頤其氣冲謚鳬鳥倦飛鷗邨獨還雙槩碧潄  
一筇青山繪之畫圖申以歌詠千載風流霞奔玉映  
晉江杜貞義姑贊

不男而庭趨不婦而治厨不嫠而撫孤集蓼茹荼撤

環瑱者七十年有餘以牧厥居以增厥廬閱再世而將六雛以光啓其門閭偉哉乎杜氏之姑

讀書圖贊

爲父虞卿作

維春之韶麗哉皇京玉河始清羣芳載榮靡靡綠楊  
關關流鶯書帷旣褰琴和酒清撫卷長嘯四無人聲  
落花不言新詩偶成羈懷浩然何羨組纓

詩龕圖贊

爲法梧門先生

猗猗長松下蔭高竹天風臨之振響如玉中有詩人  
積卷盈屋不知冬春何論榮辱落花微紅曉月初綠

詩懷浩然如水赴谷斯龕斯圖惟千載獨

誠一先生像贊

爲吳錫泰作

學誠心一貌清而頎伯陽知足蘧子覺非生不入東  
林黨沒而祀淮海祠鴻之冥冥耶鳳之師師耶非夫  
樂天知命而不疑者耶

愛石圖贊

爲王石如作

金之將將不如石之硜硜玉之瑑瑑不如石之砢砢  
卉木之便娟不如石之堅頑惟介斯貞惟不才斯壽  
惟嶽嶽而怪醜斯不爲萬物垢噫嗟嗟夫是之謂石

友

訓兒語

道光初元辛巳孟夏余將解組兒也牽衣有慙康成  
無慕靖節倚裝書此示庚虞兩兒

一曰慎起居勞憊之軀當懲旣往穉弱之質宜戒將  
來正心以靖其源窒慾以遏其流如是而已

一曰省思慮傳箴越畔禮慎出謀悠悠我心耿耿不  
寐此大惑也昔余覆轍作爾前車

一曰澹榮利窮通有數富貴在天榮者辱之媒利者

害之數匪能外之姑云澹之

一曰擇交游益友輔仁燕朋廢學交游不慎害不勝言親君子遠小人是謂能擇

題徐晴圃同年拈花行看

同年徐晴圃方伯以行看子屬題問何名曰拈花余展觀之畫憑檻執蘭狀余謂方伯曰此宜名采蘭不當名拈花也方伯曰有說乎余曰有方方伯之爲此圖也時在閩閩蘭甲天下方伯句宣來此布德意申條教則崇蘭扇芬也式古訓肅官箴則紉蘭爲佩也

培善類伸士氣則滋蘭九畹也進君子退小人則藝  
蘭十步也而且室有同心則蘭言可誦焉庭有佳樹  
則蘭蕙爭翹焉其于蘭也登坂而尋之披榛而采之  
不其汲汲矣乎若夫世尊拈花迦葉微笑乃釋氏超  
悟之說非所語于方伯斯時也又況綺牕獨憑瓊夢  
在手廬山面目宛然矣方伯笑曰有是哉請更其名  
曰采蘭

題司空表聖詩品

碧月墮水梅花不知萬籟蕭然其中有詩耳受則室



口勝益離咄哉司空乃拾得之元氣在手溢而爲辭  
珠零錦粲不著一絲清琴罷彈好風徐吹後有作者  
其曰口口

鞍燬說

覺叟市一鞍以飾騎騎自秦中來被而騁于郊騎盤  
叟墮傷股叟惜鞍之新也羃而皮之西室之隅一日  
移几下几長十尺局兩足納鞍綽有餘也是夕叟不  
寐起凭几作書罷歸東室卧少選鼻端有煙氣疑之  
四顧無所見復就枕俄聞擊柝者呼遽起趨西室則

火赫然然遏于几未炎且急沃以水火滅而鞍燬焉  
叟俯而思蓋作書時誤投燭燼于鞍上也或曰異哉  
叟惜物而物燬物固不宜惜歟或曰鞍不移不燬是  
燬于移也或又曰幸也鞍之移纔一曰其燬數也設  
不移則其地偏他物所燬將愈甚叟笑曰然哉諸子  
之言也抑曰者謂予六十將大厄曩騎而墮厄矣豈  
鞍崇耶今鞍燬則崇者去吾其免于厄矣且烏知鞍  
之崇非爲我德乎作鞍燬說

擬朱子毀秦檜祠檄

竊見故丞相秦檜虺蜴爲心蛛蝥舞智頭能壓日威  
震主而竊自北庭德果格天議和戎而迫成南渡舉  
天下志士仁人之氣銷作佞柔極古來亂臣賊子之  
奸無其倫比冤哉趙相空歸絕徼之魂痛矣岳侯竟  
抱奇冤而死其他毒害不可殫原幸而潛伏冥誅未  
盡忠良于一網何得濫叨血食徒貽唾罵于千秋亟  
予毀除用申彰瘡

三后羣后

儀徵阮氏敘劉向列女傳謂汝后稷作汝居稷漢去古

未遠必有所據予頗然之已載於隨錄中因思畢命之  
三后協心指周公君陳畢公呂刑之三后成功指伯夷  
禹稷泰誓羣后以師畢會指大會孟津之諸侯古人用  
字甚寬似於君后等字亦不甚分別后稷或是居稷之  
誤若三后羣后其辭顯然斷無訛舛也四子書干戈朕  
琴朕離騷朕皇考曰伯庸臣下自稱尙如此安見后之  
不可稱臣下耶

連敖票客

功臣表載韓信入漢爲連敖票客師古曰以其票疾而

賓客禮之故云票客票音頻妙反

洪武追封紀信爲王

漢高祖卽皇帝位八載而天下迺平論功定封訖十二年侯者百四十有三入功臣表共百四十七人周呂建成在外戚羹頡合陽沛德四人在王子凡百五十三人論者每謂紀信周苛同困滎陽一以守城被烹一以誑楚被燒苛之子成以父功封高景侯而信獨無聞讀高祖詔吾於天下賢士功臣可謂亡負一語竟不爲捨身救主之乘黃屋左纁者一動念漢於功臣負耶否耶信

墓在滎澤縣魏書及水經注并詳之宋真宗景德四年  
幸西京經信冢贈位太尉明正統三年勅重建紀信廟  
追封滎陽侯謚忠烈命有司致祭皆見於 大清一統  
志中河南固始縣城隍忠佑王廟有洪武五年五月五  
日詔勅一道云咨爾紀信漢代忠藎秉捐軀之節命如  
葉輕甘蹈火之慘心比丹赤約會固陵君方避威漆井  
園困滎陽臣竟赴難東闕孤忠興劉開四百年之運大  
節誑楚成千萬載之名何躋足以封雍忍大肚而忘紀  
幽魂沈淪千秋遺恨朕因闡揚以慰忠靈維彼滎陽爾

信昇遐之區特祠之祀之乃若固陵爾信從龍之地亦  
祠之祀之爰追封爾紀信爲護國翊漢幽明顯應本縣  
城隍忠佑王永鎮兩邑爾妻董氏爲護國翊漢輔忠一  
品夫人爾父紀百棟爲護國翊漢忠佑王爾母黃氏爲  
護國翊漢輔忠一品夫人子紀潼爲護國翊漢輔忠世  
子嗚呼移孝作忠貞心凜凜如在取義成仁浩氣耿耿  
常新鑒投水之韓成波捍白浪三千思人火之紀信焰  
結紅光萬疊事出兩人行同一轍前後輝映若合符節  
漢蓋明裡顏爾廟額有志景從敬畏奇烈欽哉念哉特

勅按明高帝與陳友諒戰鄱陽時友諒驍將張定邊前  
犯上舟舟適膠淺沙賊圍迫幾殆親兵總制韓成曰事  
急矣古人有殺其身而成君者臣何敢辭遂服上袍冕  
對賊衆赴水中賊衆歡呼萬歲戰遂懈而常遇春從旁  
舟射定邊上舟得脫破友諒後詔封成高成侯因漢之  
未封紀信乃追封之此元至正二十三年事蓋至洪武  
五年始頒勅建廟耳英宗正統間去洪武已五十載豈  
不知高皇帝追封詔旨何以復贈爲滎陽侯諡忠烈夫  
先侯而後王可也旣王矣而又贈侯爵絕無是理禮臣



不應疏忽乃爾明丁自申紀侯廟碑記 本朝吳香亭

侍郎 玉綸 固始縣城隍忠佑王序皆未加考證惟姓氏

譜載信立廟於順慶曰忠祐誥詞云以忠狗國代君任

患實開漢業後世知君爲重身爲輕雖廢捐不避者侯

何有焉 云 忠祐二字却與洪武詔旨合而誥詞亦未

詳何人所作也

### 九仙公主

唐王建九仙公主舊莊詩杜紫綸 詔謂唐公主列傳無

九仙之名惟方伎傳載元宗時有夜光者因九仙公主

召見溫泉予按劉禹錫亦有經東都安國觀九仙公主  
舊院詩云仙院御溝東今來事不同門開青草日樓閉  
綠楊風將犬昇天路披雲赴月宮武皇曾駐蹕親問王  
人翁據此是武皇駐蹕當在會昌年間然武宗七女并  
無號九仙者禹錫於會昌中加檢校禮部尙書卒年七  
十二豈宣宗時禹錫尙在耶姑存以竢考

錢以瑛條奏

雍正間知縣錢以瑛行取入都補授御史條奏三事一  
請飭各省督撫勒令尼姑還俗一民間養女至二十

歲外者請飭督撫諭令速行擇配一民間鬪毆每起於數十文之微請令有司於境內查明需用數十文錢之窮民賞給錢文濟其緩急以息爭端奉

上諭甚屬鄙瑣不通著以主事原職銜勒令休致回籍其條奏亦著發還

### 告狀

今民間控訴於官衙者曰告狀按狀札也又牒也北史魏秦王翰傳翰子儀道武數幸其第如家人禮儀矜功恃寵遂與宜都公穆崇伏甲謀亂崇子遂留在伏士中

道武召之將有所使遂留聞召恐發踰牆告狀帝秘而恕之此殆告狀二字之始

### 供養

禮月令收祿秩之不當供養之不宜者供養下奉上也詩有母之尸饔箋已從軍而母爲父陳飲食之具自傷不能供養也供亦作共養音恙後漢章帝建初五年春二月朔日食詔曰朕新離供養愆咎衆著上天降異大變隨之詩不云乎亦孔之醜又久旱傷麥憂心慘切公卿已下其舉直言極諫能指朕過失者各一人遣詣公

車將親覽問焉其旨巖穴爲先勿取浮華按帝母馬太后崩於四年六月故有新離供養語李密陳情表臣以供養無主亦此義也

鄉試增五言詩

乾隆二十四年己卯科裁去表判增用五言八韻詩隨園老人送香亭鄉試詩云 聖主崇詩教秋闈六韻加今年得科第比我更風華按六韻當作八韻是科先伯曾祖餘齋公諱煒由癸酉科拔貢雋京兆其試帖實五言八韻也

擬籌積貯書

管異之孝廉同有代人擬籌積貯書是一篇絕大經世文字非尋常紙上空談者也書云臣聞京師者天下之大本積貯者國家之大務今海內飛芻輓粟歲至京師意京倉所積穀多備數十年少亦宜支數歲而以臣所聞不過僅支一歲而止臣甚駭之記曰國無六年之畜曰不足無三年之畜曰急以

國家之全盛積貯止此設不幸東南有水旱漕不克繼或淮徐充濟之間有大盜如王倫者阻於途俾不得達

或畿輔倉卒有事用穀倍常時三者有一焉雖有研桑  
不知計所從出矣且夫一州一縣之大倉庫空虛則事  
至而無以辦況於煌煌

帝都

宗廟

乘輿之所在者乎以

國家之威

皇上之仁聖曩所云三患固萬萬不當有然而思患豫  
防勢之所及也患既至而後爲之所勢之所不及也此

臣之所以大憂也臣竊惟

國家富強本踰前代當乾隆中歲京倉之粟陳陳相因以數計之蓋可支二十餘歲乾隆之去今時旣未遠加以數十年內未闕一州未損一縣未加一官未增一卒何以曩者備二十歲而有餘今則僅支一年而不足論者皆謂適年以來苗賊迭起水旱間作

高宗皇帝屢施豁免之恩

皇上數沛停徵之惠坐是積貯虧缺不能復舊臣以爲是固然矣而抑猶未盡伏查京倉所放米曰官俸曰兵



糧二者去通漕不過十分之六其一養工匠歲賜之粟名曰匠米匠米在當時去京倉百分之一今則人數百倍於前而米去京倉十分之一矣其一

國初定鼎宗臣封親王者六曰豫睿禮鄭肅莊封郡王者二曰順承克勤

世宗皇帝之弟封親王者一曰怡賢此九王者皆世襲罔替七親王之世子世封親王其他子則封公公之子封鎮國將軍二郡王之世子世封郡王其他子亦封鎮國將軍凡鎮國將軍之子封輔國將軍輔國將軍之子

封奉國將軍奉國將軍之子封奉恩將軍凡俸親王萬斛郡王五千公一千以次降合而名曰恩米夫九王之初封其子孫不過數人後則愈衍愈衆至於今枝繁葉盛蓋其人已數倍於前矣而

國家封爵賜米必一一如其人數是以

國初恩米去京倉不過百分之一今則不啻十之三四矣以通漕十分官俸兵糧去其六匠米去其一恩米去其三四是故一歲之漕僅敷一歲之用漕一不足則必抽舊積舊者日絀而新者無贏然則京倉之粟日減日

虛三十年而大變於前者無足怪也夫

國家之大所賴以辦事者官所賴以捍患者兵官俸兵糧勢不可減而我

朝於滿兵盡人而養之自乾隆時論者已憂焉無善計耳至於工匠則事不同矣經曰既廩稱事又曰考其弓弩以上下其食然則古之工匠食稱其事初無虛養之時今之匠役無事而食者蓋過衆爲今日計莫若裁汰散遣僅留其魁若干人俟有興造然後及時召募計其工而賜之食如此則下無游食之民上無虛糜之賜而

所謂匠米者可以復減如前矣九王之子孫爵祿豐厚此自

國家追念前勲恩德至渥然臣聞之親親有殺尊賢有等以人臣之嗣世同

皇昆弟

皇子之封其酬勲已至極而其他子孫又人人食王公之祿則待之母乃過優乎

國家享祚億萬年諸王子孫曰采海內物力必有不給之時人臣與國同休戚

主上匱乏而私室豐盈諸王之靈抑恐未安於地下也  
爲今日計爵則仍之祿則減之彼其人果才賢自可爲  
國當官別受在官之俸而愚不肖者不得濫叨厚賜如  
此則宗室皆知奮勵而所謂恩米者可以復減如前矣  
夫匠米恩米復減如前則京倉所積歲已有餘以數計  
之蓋三年則可餘一年之食九年則可餘三年之食然  
則不出十年而京倉之積貯已多矣論者或謂匠米可  
減也減恩米恐非

聖世所宜行臣請有以折之昔周之初大封同姓而武

王昆弟五叔乃無官矧其子孫豈容不辨別賢否而概以王公之祿予之宋相王安石議減宗室恩例宗室伺其出羣譁馬首安石厲聲斥曰祖宗親盡則祧何況賢輩諸人遂無辭而退至哉言乎不可以人廢也臣愚以爲此事也行有五利焉京師積穀有餘一利也匠民散於民間畿輔穀賤二利也諸王子孫不驕惰三利也積穀有餘則徑可停運一二年而用其間以大治河工四利也旂丁但予坐糧則所云幫費者省而州縣之虧空可彌矣五利也變一事而與五利補救之謀無加於此

若夫興水利議屯田裁減滿兵糧額事體重大非旦夕  
所可行臣今未敢議焉

蕉軒隨錄卷五終